

## **POLIGAMI TANPA KEBENARAN: KAJIAN TERHADAP KES- KES DI MAHKAMAH TINGGI SYARIAH MUAR, JOHOR TAHUN 2015-2019**

**Norain Mohd Shah**

Fakulti Keilmuan Islam, Kolej Universiti Islam Melaka

**Khairul Azhar Meerangani**

Akademi Pengajian Islam Kontemporari,  
Universiti Teknologi MARA (UiTM) Cawangan Melaka

*Corresponding Author's Email: girlsleha88@yahoo.com.my*

### **Article history:**

*Received : 18 June 2021*

*Accepted : 13 August 2021*

*Published : 10 September 2021*

### **ABSTRAK**

Kes poligami tanpa kebenaran merupakan antara kes yang sering dilaporkan di mahkamah syariah. Prosedur yang diperkenalkan pihak mahkamah, secara asasnya berperanan memelihara hak dan tanggungjawab setiap pasangan yang berpoligami selaras dengan matlamat syarak. Namun begitu, masih wujud segelintir pihak yang mengambil jalan pintas untuk berpoligami dengan membelakangkan peruntukan undang-undang sedia ada, sebagaimana yang termaktub dalam Undang-Undang Keluarga Islam setiap negeri. Kajian bertujuan mengenalpasti poligami tanpa kebenaran yang dilaporkan di Mahkamah Tinggi Syariah Muar, Johor serta implikasi pelanggaran peruntukan tersebut. Kajian dijalankan secara kualitatif menerusi analisis terhadap dokumen penghakiman serta temubual yang dijalankan dengan pihak-pihak yang terlibat dengan prosedur poligami di Mahkamah Tinggi Syariah Muar, Johor. Prosedur poligami meskipun tidak menjadi salah satu rukun sah perkahwinan menurut Islam, namun ia merupakan asas penting dalam memastikan matlamat perkahwinan tercapai dan terpelihara. Prosedur permohonan dan kelulusan poligami yang ketat dilihat menjadi punca segelintir pihak sengaja mencari jalan mudah untuk berpoligami meskipun tanpa kebenaran daripada pihak mahkamah. Penguatkuasaan yang tegas dan hukuman yang sewajarnya perlu diterapkan bagi mendidik setiap pasangan kepentingan mematuhi prosedur dan peraturan yang ditetapkan, sekaligus memelihara hak dan tanggungjawab setiap pasangan selepas perkahwinan tersebut.

**Kata Kunci:** Poligami Tanpa Kebenaran, Prosedur, Pentadbiran, Undang-Undang Keluarga Islam

## ***POLIGAMI TANPA KEBENARAN: KAJIAN TERHADAP KES-KES DI MAHKAMAH TINGGI SYARIAH MUAR, JOHOR TAHUN 2015- 2019***

### **ABSTRACT**

*Cases of polygamy without permission are among the cases that are often reported in sharia courts. The procedure introduced by the court, basically serves to preserve the rights and responsibilities of each polygamous couple in line with Islamic goals. However, there are still a few parties who take a shortcut to polygamy by ignoring the provisions of existing laws, as enshrined in the Islamic Family Law of each state. The study aims to identify polygamy without permission reported in the Syariah High Court of Muar, Johor as well as the implications of violation of the provision. The study was conducted qualitatively through analysis of judgment documents as well as interviews conducted with parties involved in polygamy procedures in the Syariah High Court of Muar, Johor. The procedure of polygamy, although not one of the legal pillars of marriage according to Islam, but it is an important basis in ensuring that the goals of marriage are achieved and preserved. Strict polygamy application and approval procedures are seen as the cause of some parties deliberately looking for easy ways to have polygamy even without permission from the court. Strict enforcement and appropriate punishment should be applied to educate each spouse of interests to adhere to established procedures and rules, while preserving the rights and responsibilities of each spouse after the marriage.*

**Keywords:** *Polygamy Without Permission, Procedure, Administration, Islamic Family Law*

### **PENGENALAN**

Poligami bererti menghimpunkan lebih dari satu orang, sama ada dua, tiga atau had maksimumnya empat orang isteri dalam satu masa. Meskipun Islam secara asasnya mengharuskan poligami, namun setiap pemohon perlu mematuhi peraturan dan prosedur yang ditetapkan, terutamanya keperluan untuk berlaku adil serta tidak menzalimi hak dan kewajipan yang ditetapkan buat setiap isteri dan anak-anaknya. Elemen keadilan ini pula dinilai menerusi peruntukan nafkah, giliran bermalam dan kasih sayang yang diberikan secara saksama terhadap semua tanggungannya (Zulkifli, 2013). Walaupun sebahagian pihak melihat poligami sebagai suatu liabiliti, Islam terlebih dahulu menyusunnya sebagai suatu tanggungjawab dan komitmen yang perlu dilaksanakan bertujuan memelihara hak dan nasib wanita yang dikahwini. Sebarang kecuaiian dalam pelaksanaan hak ini hanya mengundang dosa dan menyebabkan pelakunya berhadapan dengan ancaman berat di akhirat (Hanif Yusoh, 2015). Atas dasar itulah, Islam telah menetapkan beberapa panduan dan syarat yang perlu diberi perhatian penting,

khususnyabuat pengamal poligami bagi memastikan manifestasi sebenar poligami dapat diimplementasikan dengan sebenarnya (Farrah Wahida, 2018).

Urusan perkahwinan membabitkan umat Islam terletak di bawah bidang kuasa Mahkamah Syariah. Setiap negeri diberikan peruntukan kuasa untuk menggubal dan menetapkan enakmen undang-undang keluarga masing-masing. Berdasarkan peruntukan tersebut, semua bentuk perkahwinan membabitkan umat Islam perlulah mendapat kebenaran daripada pihak mahkamah terlebih dahulu. Setelah pihak mahkamah berpuas hati dengan segala dokumen dan prosedur yang dipenuhi, barulah sesebuah perkahwinan itu dianggap sah dan direkodkan (Khairul Azhar, 2018). Perkahwinan secara poligami tidak terkecuali daripada syarat ini, bahkan prosedur yang ditetapkan juga dilihat lebih ketat berbanding perkahwinan biasa. Dalam konteks Malaysia, selain mematuhi peraturan syarak dalam melaksanakan perkahwinan yang sah, seseorang individu yang ingin berpoligami juga terikat dengan prosedur yang telah ditetapkan oleh pihak mahkamah. Pemohon perlu mengajukan affidavit sokongan beserta dengan alasan permohonan kepada pihak Mahkamah Tinggi Syariah bagi mendapatkan perintah kebenaran berpoligami. Pihak mahkamah seterusnya akan menilai alasan permohonan poligami, status pendapatan pemohon dan butir-butir komitmen yang ditanggung seperti bayaran nafkah, hutang dan sebagainya (Jabatan Bantuan Guaman, 2018).

Dengan prosedur yang ketat sebegini, maka tidak hairanlah sebahagian pasangan lebih sanggup mengambil jalan mudah dengan berkahwin tanpa melalui kebenaran mahkamah. Perkahwinan seperti ini pada lazimnya dijalankan menerusi bantuan sindiket di Selatan Thailand, terutamanya di wilayah Songkhla, Thailand. Berdasarkan laporan, hampir 1000 acara pernikahan dilakukan di Selatan Thailand setiap bulan kerana keterbukaan negara itu dalam hal perkahwinan (Berita Harian, 2019). Penilaian akan dijalankan bagi memastikan pemohon mampu memenuhi syarat-syarat yang ditetapkan, sebelum kebenaran dikeluarkan oleh pihak mahkamah. Penetapan prosedur ini penting agar urusan perkahwinan tersebut direkodkan dalam bentuk dokumen, supaya urusan pentadbiran lebih sistematik dan teratur. Dengan adanya prosedur poligami ini, segala kelemahan dan penyelewengan yang berlaku sama ada sebelum atau selepas berkahwin dapat diatasi khususnya apabila pihak isteri dan anak-anak membuat sebarang tuntutan di mahkamah. Prosedur poligami ini amat penting untuk menjamin hak isteri yang dipoligamikan, yang mana kebanyakan mereka sendiri tidak mengetahui hak dan tanggungjawab yang berhak diterima.

## **KAJIAN LEPAS**

Penulisan dan kajian mengenai poligami tanpa kebenaran paling banyak di tulis dan dikaji di Malaysia kerana perkara-perkara yang berkaitan dengan kekeluargaan Islam di amalkan dan dilaksanakan sepenuhnya dalam kehidupan masyarakat Malaysia sejak dahulu lagi. Penulisan-penulisan tersebut bercampur aduk antara perbincangan dari perspektif hukum syarak dan juga kepada penulisan perundangan berdasarkan peruntukan-peruntukan kekeluargaan dalam Enakmen pentadbiran Agama Islam. (Raihana Abdullah, 2015). Oleh itu

penulisan-penulisan berkaitan dengan prosedur dalam poligami tanpa kebenaran mahkamah, poligami yang tidak mengikut prosedur merangkumi beberapa aspek seperti prosedur berpoligami, implikasi poligami tanpa kebenaran mahkamah serta penalti hukuman yang dikenakan bagi berpoligami tanpa kebenaran.


Sekiranya diperhatikan kepada penulisan dan kajian mengenai poligami tanpa kebenaran mahkamah, perkara ini sering berlaku dalam masyarakat di Malaysia, perkahwinan ini lebih mudah apabila ia dilangsungkan diluar kawasan. Perkara ini menyebabkan perkahwinan tidak didaftarkan secara langsung di bawah UKKI di Malaysia. Selain itu, ia tidak diketahui oleh sesiapa termasuklah isteri pertama. Kesan daripada ini juga menyebabkan anak-anak tidak dapat didaftarkan kerana ketidaksahihan nikah kedua Ibubapa mereka. (Nabila Yusuf, 2013)

Selain itu, Amir Husin Md Nor mengulas bahawa Nikah di luar negara dibenarkan dalam Enakmen Undang-undang Keluarga Islam 1990 tetapi dimestikan mendapat kebenaran pihak berkuasa agama terlebih dahulu. Sekiranya dilakukan tanpa kebenaran ia boleh dituduh telah melakukan satu kesalahan di bawah seksyen 39 Enakmen di atas dan boleh dihukum dengan denda tidak melebihi RM1000 dan penjara tidak melebihi 6 bulan atau kedua-duanya sekali di bawah Seksyen 122 enakmen yang sama. Isu pernikahan di luar negara semakin hangat pada awal tahun 2003 apabila Kerajaan Negeri Perlis mengumumkan akan memudahkan lelaki berpoligami termasuk melonggarkan syarat tidak memerlukan kebenaran isteri pertama bagi menyekat lelaki di negara ini pergi ke Thailand untuk berkahwin. Gambaran yang diberikan dari laporan akhbar seolah-olah setiap pasangan yang bernikah di luar negara (khususnya Thailand) adalah pernikahan poligami atau kahwin lari, sedangkan kemungkinan banyak lagi sebab-sebab yang mendorong pasangan tersebut bernikah di luar negara. Bagi negeri Johor, pernikahan juga tidak terkecuali dari menjadi isu dalam masyarakat. Jika diperhatikan dengan teliti, 'trend' pernikahan di luar negara tanpa kebenaran ini semakin ketara dari setahun ke setahun sehingga menimbulkan kebimbangan pihak-pihak yang berwajib. Sebagai contoh, bagi daerah Muar sahaja pada tahun 2001 terdapat 6 kes pemohonan '*Isbab Nikah*' (pengesahan nikah) di Mahkamah Syariah Muar, Johor. Jumlah ini tidak termasuk pasangan yang belum atau tidak mahu mendaftarkan pernikahan mereka pada tahun berkenaan. Jumlah ini terus meningkat lebih mendadak pada tahun 2002 dengan 39 kes dan peningkatan terus berlaku pada tahun 2003 dengan 54 kes.

Isu pernikahan di luar negara ini jika tidak dipantau dan dikawal, mungkin sedikit sebanyak akan menimbulkan masalah dan kesusahan ke atas pihak-pihak berkenaan khususnya jika pernikahan itu melibatkan poligami, mengandung di luar nikah, ketidakinan keluarga, pernikahan secara paksa, nikah sindiket atau penipuan. Selain daripada itu, adalah menjadi tanggungjawab bersama memastikan semua rakyat Malaysia khususnya Umat Islam sentiasa mematuhi peraturan yang telah diatur untuk mereka agar kehidupan mereka lebih teratur, harmoni, gembira dan maju. (Amir Husin Md Nor, 2006)

## JADUAL DAN RAJAH

Poligami tanpa kebenaran boleh menyebabkan matlamat sesebuah perkahwinan itu sukar dicapai, seperti nikmat kehidupan berumahtangga serta tuntutan hak yang berkaitan. Kebanyakan mereka terpaksa menyembunyikan status perkahwinan daripadapengetahuan umum, terutamanya isteri pertama. Selain itu, perkahwinan ini juga berisiko kerana suami tidak terikat dengan sebarang komitmen dan tanggungjawab terhadap isteri barunya. Berdasarkan statistik yang dikeluarkan oleh pihak Mahkamah Tinggi Syariah Muar, terdapat peningkatan kes yang dicatatkan bagi kesalahan poligami tanpa kebenaran dari tahun 2016 hingga 2019, iaitu sebanyak 57 kes pada tahun 2016, 60 kes pada tahun 2017, 63 kes pada tahun 2018 dan seterusnya mendadak kepada 104 kes pada tahun 2019, sebagaimana yang dapat dilihat dalam carta berikut:



Carta 1: Statistik Kes Poligami Tanpa Kebenaran Mahkamah Di Mahkamah Tinggi Syariah Muar, Johor, 2016-2019  
(Sumber : Mahkamah Tinggi Syariah Muar, Johor)

Berdasarkan rekod, perkahwinan secara poligami tanpa kebenaran mahkamah boleh berlaku sama ada di dalam Malaysia mahupun di luar negara. Poligami merupakan kelonggaran perkahwinanyang bersifat terhad dan bersyarat(Ahmad Jalil,2012) Poligami tanpa kebenaran mahkamah, sama ada yang dilangsungkan di dalam atau di luar Malaysia, tetap mempunyai impak yang besar terutamanya dalam aspek perundangan. Berdasarkan penelitian yang dilakukan, terdapat beberapa faktor yang mendorong kepada berlakunya kesalahan poligami tanpa kebenaran ini, antaranya:

### Prosedur Permohonan Poligami Yang Ketat

Peraturan yang terdapat dalam enakmen undang-undang keluarga Islam negeri-negeri sering kali dilihat sebagai sesuatu yang rumit dan membebankan oleh sesetengah pihak, serta memakan masa yang lama. Peraturan pernikahan di

negeri Johor melalui Enakmen Undang-undang Keluarga Islam 2003 antara lain bertujuan menyusun atur dan mengawal isu-isu yang berkaitan dengan perkahwinan, penceraian dan hal-hal yang bersangkutan dengannya. Bagaimanapun, terdapat segelintir rakyat negeri Johor yang beranggapan peruntukan undang-undang yang telah ditetapkan adalah sangat menyusahkan dan membebankan. Umpamanya, peraturan yang mensyaratkan setiap pasangan yang hendak bernikah membeli borang, mengisi dan melengkapkannya, menghadiri kursus pra perkahwinan, mendapatkan surat akuan bujang, surat akuan mastautin, surat pengesahan Jabatan Pendaftaran Negara bagi pemegang Penduduk Tetap, menghadiri temu bual dan sebagainya yang memerlukan pengorbanan masa, tenaga dan wang.

Malah bagi kes-kes tertentu, ia akan dirujuk ke mahkamah Syariah terlebih dahulu sebelum diluluskan, seperti kes wali enggan, permohonan poligami dan kes yang bersangkutan dengan penceraian. Bagi sesetengah pasangan, peraturan-peraturan ini sangat membebankan dan menjadi penghalang utama hasrat mereka untuk menjadi pasangan suami isteri. Sebagai alternatif, mereka lebih cenderung untuk membelakangi peraturan tersebut dengan menjalankan perkahwinan di luar Malaysia kerana beranggapan proses pernikahan di sesetengah negara luar itu lebih mudah untuk dilakukan berbanding di dalam negara sendiri. Perlu difahami, undang-undang yang ada ini bukanlah untuk menyusahkan mana-mana pihak, tetapi bertujuan mentadbir proses poligami agar teratur, licin dan menepati tujuan dan syarat berpoligami. Orang yang diberikan amanah untuk memberi kata putus di dalam perkara ini adalah hakim yang memang merupakan orang yang berwibawa di dalam perkara ini. Bagi pihak yang tidak berpuas hati terhadap keputusan hakim masih berpeluang membuat rayuan ke mahkamah (Siti Fadhilah, 2018).

Sebagai contoh dalam kes membabitkan pemohon pertama *Musannif bin Abdullah* dengan pasangannya selaku permohonan kedua *Nor Hayati binti Othman*. Pasangan warganegara Malaysia ini telah bernikah di Pattani, Thailand dengan menggunakan wali hakim. Alasan yang diberikan oleh pasangan ini ialah prosedur permohonan poligami di negeri Johor adalah sukar. Beliau juga menyatakan bahawa hubungan isteri pertama dengan isteri kedua juga adalah baik (Amir Husin, 2016). Selain itu, terdapat juga suami yang ditolak permohonan poligami mereka, kerana permohonan tersebut tidak menepati kehendak pihak mahkamah. Sebagai contoh dalam kes *Hashim Bin Hassan dan Nurhayati Binti Talib Sukardi* yang memohon pengesahan perkahwinan mereka di mahkamah. Pasangan ini telah melangsungkan perkahwinan mereka di Indonesia dengan berwalikan abang kepada pihak perempuan, setelah permohonan awal pihak lelaki ditolak oleh mahkamah. Pasangan ini menyatakan bahawa perkahwinan mereka telah mendapat kebenaran daripada Pendaftar Nikah, Cerai dan Rujuk di negeri Johoran, dan hakim seterusnya telah memutuskan perkahwinan mereka kes sebagai sah pada hukum syarak, dan didaftarkan sebagai satu perkahwinan yang sah di bawah Enakmen Undang-undang Keluarga Islam 2003. Dalam kes ini, faktor yang mendorong pasangan ini bernikah di luar negara adalah disebabkan kesukaran menjalankan perkahwinan di Johor, dengan pelbagai prosedur rumit yang perlu dipenuhi.

## **Tidak Mendapat Kebenaran Isteri**

Faktor lain yang menyebabkan pihak suami berpoligami tanpa kebenaran mahkamah adalah kerana tidak mendapat keizinan isteri atau isteri-isteri sedia ada. Penetapan syarat keizinan pihak isteri sebelum berpoligami sebenarnya tidak bersifat mutlak. Peruntukan lain dalam enakmen undang-undang keluarga Islam negeri-negeri menghendaki mahkamah memanggil pemohon dan isteri atau isteri-isteri sedia ada hadir ke mahkamah untuk memberikan keterangan secara tertutup tentang perkahwinan yang dicadangkan, setelah permohonan berpoligami diterima oleh mahkamah bagi menentukan kelayakan pemohon untuk berpoligami. Hal ini secara tidak langsung menunjukkan kepentingan izin dan keterangan pihak isteri sebelum mahkamah memutuskan status permohonan pihak suami. Walaubagaimanapun, keizinan pihak isteri bukanlah satu-satunya penentu keputusan mahkamah, sebaliknya hakim turut mengambilkira faktor-faktor lain dalam menentukan kelayakan pihak suami untuk berpoligami. Terdapat kes yang mana mahkamah menolak permohonan poligami walaupun telah mendapat keizinan isteri pertama, kerana suami gagal membuktikan kemampuan untuk beristeri lebih dari seorang

Sebagai contoh, kes membabitkan pemohon *Syed Othman bin Syed Abdullah* dengan pasangannya *Ema Malisa binti Bogi*. Pasangan ini telah melangsungkan perkahwinan di Wilayah Songkhla, Thailand dengan menggunakan wali hakim. Alasan yang diberikan oleh pihak lelaki ialah kerana isteri pertamanya tidak setuju dan prosedur permohonan poligami adalah sukar sedangkan beliau amat memerlukan zuriat, memandangkan sehingga kini beliau masih belum dikurniakan zuriat bersama isteri terdahulu. Begitu juga kes membabitkan pemohon *Samsuri Bin Saar* dan pasangannya *Nor Rahsidah Binti Abdullah*. Samsuri yang merupakan warganegara Malaysia dan Rahsidah, warganegara Indonesia telah melangsungkan perkahwinan mereka di Thailand, setelah hasrat mereka ditentang oleh isteri pertama Samsuri. Hubungan rapat antara kedua-dua pemohon mendorong mereka untuk berkahwin bagi mengelakkan sebarang perlakuan yang menyalahi syaraktanpa sebarang ikatan yang sah (Amir Husin, 2016).

## **Permohonan Poligami Ditolak**

Permohonan untuk mendapatkan kebenaran bertulis dari mahkamah untuk berpoligami yang ditolak juga merupakan salah satu faktor mendorong poligami tanpa kebenaran. Hal ini menyebabkan mereka mengambil jalan mudah dengan berkahwin di negara lain tanpa kebenaran mahkamah, setelah mahkamah sendiri memutuskan bahawa pemohon kurang berkelayakan untuk berpoligami (Azmi Mahmood, 2019). Salah satu sebab kelayakan yang menjadi penilaian utama hakim adalah pendapatan suami yang mencukupi untuk berpoligami, kerana perkara ini sangat berkait rapat dengan kemampuan untuk mengagihkan nafkah yang selayaknya kepada tanggungan. Tiada penetapan khusus berkaitan had pendapatan yang diterima oleh pihak mahkamah untuk membolehkan pasangan berpoligami. Mahkamah akan meneliti sumber kewangan yang diperoleh oleh

suami serta mengambil kira faktor kemampuan khususnya dari segi komitmen suami terhadap tanggungan yang dibawahnya, seperti orang-orang yang ada di bawah tangungannya dan hutang-hutang yang ada (Siti Fadhilah, 2019)

Sekiranya mahkamah berpuas hati bahawa pemohon telah memenuhi syarat-syarat yang telah ditetapkan, kelulusan permohonan akan diberikan sekalipun pihak isteri tidak bersetuju. Kebenaran dan keengganan isteri terhadap hasrat suami untuk berpoligami tidak mengikat mahkamah, sebaliknya maklumat yang diberi adalah keterangan yang digunakan sebagai membantu mahkamah membuat keputusan meluluskan atau menolak satu-satu permohonan poligami. (Raihanan Abdullah, 2014). Penilaian kelayakan ini merupakan antara sebab utama penerimaan dan penolakan sesuatu permohonan poligami oleh pihak mahkamah. Tindakan ini sangat penting meskipun dilihat remeh oleh sesetengah pihak, memandangkan ia sangat berkait rapat dengan kelangsungan hidup setiap pihak selepas perkahwinan dijalankan. Oleh itu, tidak hairanlah apabila terdapat pasangan yang ditolak permohonannya, akan mengambil jalan pintas dan mudah untuk berkahwin di tempat yang dirasakan lebih longgar prosedur dan mudah prosesnya, iaitu di luar negara.

## **PERBINCANGAN DAN KESIMPULAN**

Amalan poligami meskipun diharuskan menurut syarak, namun perlu memenuhi syarat dan prosedur yang ditetapkan bagi mengelakkan timbulnya persepsi buruk terhadap amalan ini. Namun begitu, prosedur yang ditetapkan dalam setiap undang-undang keluarga Islam negeri-negeri telah disalahanggap sebagai membebankan pihak yang ingin berpoligami, sehingga mendorong mereka mengambil jalan pintas dengan membelakangkan peraturan sedia ada dengan menjalankan perkahwinan tanpa kebenaran mahkamah. Meskipun perkahwinan ini akhirnya boleh didaftarkan di Malaysia setelah melalui prosedur dan penalti yang ditetapkan, namun tindakan tidak bertanggungjawab ini tetap mempunyai implikasi yang buruk, bukan sahaja dalam aspek perundangan, bahkan aspek kekeluargaan. Peraturan yang ditetapkan ini sebenarnya bertujuan mengatur dan memastikan keadilan yang sewajarnya diberikan kepada pihak-pihak berkaitan, terutamanya isteri dan anak-anak. Syarat dan prosedur yang ditetapkan ini berperanan penting dalam menjamin hak bukan sahaja isteri pertama, bahkan isteri-isteri lain daripada dianiayai, disebabkan kekurangan kefahaman dan pengetahuan yang jelas terhadap kesan yang terhasil daripada kesalahan ini.

## **TEMU BUAL**

Tuan Azmi Bin Mahmood. (2019). Peguam Syarie Negeri Selangor. Temu Bual 16 September 2019.

Siti Fadhilah Binti Ahmad. (2019). Pegawai Sulh, Mahkamah Tinggi Syariah Muar Johor. Temu Bual 17 Februari 2019.



## RUJUKAN

- Abdul Hakim Baharuddin. (2017). "Status Hubungan Antara Isteri-Isteri Dalam Poligami: Analisis Terhadap Perbincangan Hukum-Hukum Fekah". Bangi: Penerbit KUIS.
- Amir Husin Md Nor. (2016). "Faktor Penyebab Perkahwinan Tanpa Kebenaran Di Luar Negara: Satu Kajian Di Mahkamah Rendah Syariah Muar". *Jurnal Syariah*, Vol. 14 No. 2: 23-39.
- Berita Harian. (2019). Dihalang Keluarga, Isteri Pertama Alasan Nikah di Thailand, <https://www.bharian.com.my/berita/nasional/2019/03/537020/di-halang-keluarga-isteri-pertama-alasan-utama-nikah-di-thailand>, dicapai pada 12 April 2020.
- Enakmen Pentadbiran Agama Islam (Negeri Johor) 2003.
- Enakmen Undang-Undang Keluarga Islam (Negeri Johor) 2003.
- Farrah Wahida Mustafar. (2018). "Konsep Poligami Mengikut Perspektif Para Isteri Dalam Jemaah Global Ikhwan Sdn.Bhd". *Jurnal Mawizah*, Vol. 1: 65-88.
- Mohd Zahiruddin Fahmi Ahmad Zakhi. (2015). "Perkahwinan Tidak Mengikut Prosedur: Kajian Di Mahkamah Syariah Wilayah Persekutuan Kuala Lumpur". Disertasi, Akademi Pengajian Islam Universiti Malaya.
- Nabila Yusof. (2013). "Status Anak Dalam Perkahwinan Sindiket Menurut Perspektif Syarak & Akta Undang-Undang Keluarga Islam (Wilayah-Wilayah Persekutuan 1984)". Prosiding, The International Conference of Social Research, (ICSSR 2013), Penang, Malaysia, 4-5 June 2013.
- Noor Aziah Mohd Awal. (2008). *Kawin Lari Dan Poligami: Respon Wanita Dan Implikasi Undang-Undang*. Kuala Lumpur: International Law Book Services.